

Na osnovu člana 9. Zakona o federalnim ministarstvima i drugim tijelima federalne uprave ("Službene novine Federacije BiH", br. 19/03, 38/05, 2/06 i 8/06) i odredbama Odluke o usvajanju Programa utroška sredstava utvrđenih u razdjelu 17. Budžeta Federacije Bosne i Hercegovine za 2022. godinu Federalnom ministarstvu energije, rudarstva i industrije „Tekući transferi i drugi tekući rashodi – Tekući transferi pojedincima- Poticaj pojedincima pri kupovini električnih automobila“, („Službene novine Federacije BiH", broj 39/22), Federalno ministarstvo energije, rudarstva i industrije o b j a v l j u j e:

**JAVNI POZIV
ZA KANDIDOVANJE PROGRAMA UTROŠKA SREDSTAVA UTVRĐENIH U
RAZDJELU 17. BUDŽETA FEDERACIJE BOSNE I HERCEGOVINE ZA 2022.
GODINU FEDERALNOM MINISTARSTVU ENERGIJE, RUDARSTVA I
INDUSTRIJE „TEKUĆI TRANSFERI I DRUGI TEKUĆI RASHODI – TEKUĆI
TRANSFERI POJEDINCIMA- POTICAJ POJEDINCIMA PRI KUPOVINI
ELEKTRIČNIH AUTOMOBILA“**

I PREDMET JAVNOG POZIVA

Predmet Javnog poziva je prikupljanje zahtjeva za odabir korisnika grant sredstava, u skladu sa Programom utroška sredstava utvrđenih u razdjelu 17. Budžeta Federacije Bosne i Hercegovine za 2022. godinu Federalnom ministarstvu energije, rudarstva i industrije „Tekući transferi i drugi tekući rashodi – Tekući transferi pojedincima- Poticaj pojedincima pri kupovini električnih automobila“ („Službene novine Federacije BiH", broj 39/22), (u daljem tekstu: Program).

II SVRHA DODJELE SREDSTAVA

Cilj ovog Javnog poziva je poticaj kupovine i upotrebe električnih automobila u Federaciji BiH, putem dodjele subvencije pojedincima za kupovinu novih automobila, registrovanih u Federaciji BiH, za period 01.01.2022.-12.12.2022. godine koji imaju:

- isključivo električni pogon
- koriste dva izvora energije - električni motor i motor sa unutrašnjim sagorijevanjem (plug-in -hybrid) i
- vozila koja koriste motor sa unutrašnjim sagorijevanjem i elektro motor (full-hybrid)

Pod novim automobilom, smatra se putničko vozilo koje nije bilo u upotrebi i nikada nigdje, nije bilo registrovano.

Automobili za koje se dodjeljuju subvencije su putnička vozila sa najviše 9 mjesta za sjedenje, uključujući i sjedište vozača - putnička vozila kategorije M1 (u daljem tekstu: vozila).

Tehnički uslovi za prihvatljiva vozila:

1. Električna vozila sa emisijom CO₂ 0 g/km
2. Hibridna električna „plug-in“ vozila sa emisijom CO₂ manje od 50 g/km
3. Hibridna vozila „full hybrid“ vozila sa emisijama CO₂ najviše 130 g/km

III PRAVO UČEŠĆA I KRITERIJI ZA IZBOR KORISNIKA

Pravo učešća na Javnom pozivu imaju pojedinci (fizička lica), državljani Bosne i Hercegovine, sa prebivalištem u Federaciji Bosne i Hercegovine i sa navršениh 18 godina života, koji podnesu zahtjev, dostave obaveznu dokumentaciju u skladu sa ovim Javnim pozivom i da, u trenutku podnošenja zahtjeva, postoje raspoloživa finansijska sredstva predviđena budžetom, za namjenu subvencioniranja kupovine vozila, tj. u trenutku prijave ne budu već dodijeljena drugim korisnicima.

Visina iznosa koji se dodjeljuje kao finansijski poticaj pojedincima:

- | | |
|--|--------------|
| - Električna vozila – | 10.000,00 KM |
| - Hibridna električna „plug-in“ vozila – | 5.000,00 KM |
| - Hibridna „full hybrid“ vozila – | 5.000,00 KM |

Finansijska sredstva pojedincima mogu se dodijeliti za kupovinu, odnosno registraciju samo jednog vozila.

Neprihvatljivi korisnik subvencije je korisnik koji je u 2022. godini, već ostvario pravo subvencije za kupovinu vozila iz budžeta za 2022. godinu, bilo kojeg nivoa vlasti u Federaciji BiH.

IV SREDSTVA PREDVIĐENA ZA DODJELU

Finansijska sredstva predviđena za dodjelu po ovom Programu, čine sredstva planirana Budžetom Federacije Bosne i Hercegovine za 2022. godinu u razdjelu 17., ekonomski kod 6142, u ukupnom iznosu od 1.000.000,00 KM.

Navedena sredstva su grant sredstva.

V TRAJANJE JAVNOG POZIVA

Javni poziv je otvoren od dana objave u „Službenim novinama Federacije BiH“ do 12.12.2022. godine (Ministarstvo će razmatrati zahtjeve zaprimljene zaključno sa navedenim datumom) ili utroška finansijskih sredstava u iznosu od 1.000.000,00 KM, u zavisnosti od toga koji uslov prije nastupi.

Podnosioci čiji su zahtjevi odbijeni u toku trajanja ovoga Javnog poziva, zbog određenih nedostataka, mogu ponovo podnijeti zahtjev za dodjelu finansijskih sredstava.

VI PROVOĐENJE PROGRAMA I JAVNOG POZIVA

Zahtjev za prijavu na Javni poziv, potencijalni korisnici finansijskih sredstava trebaju dostaviti uz slijedeću dokumentaciju:

1. Zahtjev za dodjelu subvencije (preuzet sa web stranice Ministarstva www.fmeri.gov.ba)
2. Kopija lične karte i original CIPS potvrda podnosioca ne starija od 3 mjeseca
3. Ugovor ili faktura o kupoprodaji motornog vozila sa tehničkim karakteristikama iz kojih je jasno vidljiva kategorija, proizvođač, tip, model, vrsta goriva, izvor snage i emisija CO₂ (ovjerena kopija)
4. Potvrda o izvršenom tehničkom pregledu vozila (original ili ovjerena kopija)

5. Potvrda o registraciji (saobraćajna dozvola) na ime podnosioca zahtjeva za vozilo, izdato od strane nadležnog Federalnog MUP-a za 2022. godinu - prva registracija (ovjerena kopija)
6. Izjavu, potpisanu od strane podnosioca zahtjeva, koja se može preuzeti na web stranici Ministarstva (www.fmeri.gov.ba) kojom se podnosilac obavezuje da će vozilo za koje je dobilo subvenciju zadržati u vlasništvu najmanje 2 (dvije) godine.
7. Izjavu, potpisanu od strane podnosioca zahtjeva, koja se može preuzeti na web stranici Ministarstva (www.fmeri.gov.ba), kojom podnosilac izjavljuje da nije ostvario pravo na subvenciju za vozilo u 2022. godini kod drugog budžetskog korisnika u Federaciji BiH.

Postupak dodjele finansijskih sredstava predstavlja sveobuhvatni postupak odabira zahtjeva za dodjelu sredstava i sastoji se od sljedećih faza:

- zaprimanje zahtjeva
- administrativna provjera ispravnosti dostavljene dokumentacije
- prijedlog odluke o dodjeli finansijskih sredstava dostavlja se Vladi Federacije BiH na odlučivanje i objavljuje u „Službenim novinama Federacije BiH“ kao i na web stranici Ministarstva
- potpisivanje ugovora o dodjeli finansijskih sredstava i prenos novčanih sredstava.

Neuspješni podnosioci zahtjeva za dodjelu finansijskih sredstava će biti obaviješteni u pisanom obliku, uz navode razloga za odbijanje.

VII KANDIDOVANJE PO JAVNOM POZIVU

Pismeni zahtjev za dodjelu finansijskih sredstava, sa ostalom potrebnom dokumentacijom po Javnom pozivu, poredanom po tačkama Javnog poziva, podnosi se Federalnom ministarstvu energije, rudarstva i industrije.

Podnosilac po predmetnom Javnom pozivu za dodjelu finansijskih sredstava može podnijeti, u toku važeće budžetske godine, više od jednog zahtjeva, samo ukoliko mu po prethodnom zahtjevu nisu odobrena finansijskih sredstva.

Postupak dodjele obuhvata razdoblje od predaje zahtjeva do donošenja konačne odluke o predmetnom zahtjevu. Podnosilac zahtjeva ne može podnijeti više zahtjeva istovremeno, po ovom Javnom pozivu.

VIII PRIPREMA

Zahtjevi za dodjelu finansijskih sredstava, sa odgovarajućom dokumentacijom iz poglavlja VI Javnog poziva, dostavljaju se preporučeno poštom ili lično u zatvorenoj, neprovidnoj koverti na adresu: Federalno ministarstvo energije, rudarstva i industrije Mostar, Alekse Šantića b.b. 88 000 Mostar s naznakom: Ne otvarati – po Javnom pozivu za kandidovanje Programa utroška sredstava Budžeta FBiH za 2022. godinu, „Poticaj pojedincima pri kupovini električnih automobila“

Na poleđini koverta, obavezno navesti ime, adresu i kontakt telefon.

Podnosilac zahtjeva može izmijeniti ili povući svoj zahtjev u roku od 15 dana od dana podnošenja zahtjeva, a Federalno ministarstvo energije, rudarstva i industrije o tome biti obaviješteno u pisanoj formi. Izmjena ili povlačenje zahtjeva mora biti izvršena u skladu sa ovim poglavljem. Osim toga, na koverti u kojoj se nalazi obavještenje o izmjeni ili povlačenju zahtjeva treba pisati „IZMJENA ZAHTJEVA“ ili „POVLAČENJE ZAHTJEVA“.

Povrat dokumentacije se vrši isključivo na pismeni zahtjev podnosioca.

Sve odluke se objavljuju u „Službenim novinama Federacije BiH“ i na službenoj web stranici Ministarstva.

Ovaj poziv ostaje otvoren do utroška sredstava ili do 12.12.2022. godine (ako do tog datuma finansijska sredstva ne budu utrošena).